

Evening Dogri (NSD) Bulletin 20-07-2024

आकाशवाणी

खास खबरां ...

- 1 सरकारै संसद दे बजट इजलास शा पैहले कल ऐतवारें सब्बने पार्टिएं दी इक बैठक सद्दी ऐ।
- 2 माईक्रोसाफ्ट दिएं सेवाएं च आई दी गड़बड़ी परैंत हुन मुख्य दे सब्बनें ब्हाई अड्डे पर ब्हाई जहाजें सरबंधी प्रणालिएं सामान्य तरीके कन्ने कम्म करना शुरू करी दित्ता ऐ।
- 3 भारत ते न्यूजीलैंड बपार—कारोबार, शिक्षा ते अंतरिक्ष दे खेत्तरें च आपसी साथ—सहयोग गी होर तगड़ा बनावनं
- 4 भारत ते भूआन नै 4 ज्हार 958 करोड़ रुपें दिएं कुल 61 परियोजनाएं गी मंजूरी देई दित्ती ऐ।
- 5 बंगलादेश च होआ करदे हिंसा बरोध—प्रदर्शनें करी तकरीबन 1 ज्हार भारती विद्यार्थी उत्थुआं अपने मुख्य परतोई आए न।
- 6 महिलाएं दे एशिया कप टी-20 क्रिकेट च थाईलैंड नै मलेशिया गी 22 रंजें कन्नै हराई दित्ता ऐ।

<><><><><><>

All Party Meet

सरकार नै संसद दे बजट सत्र थमां पैहले कल सांझी बैठक सद्दी ऐ। बैठक दे दरान सरकार संसद दे दौनें सदनें दे सुचारु कम्मकाज गी जकीनी बनाने लेई सब्बने बरोधी पार्टिएं थमां सहयोग दी अपील करोग। बजट सत्र संगारै शुरू होग। 23 जुलाई मंगलवारें वित्तमंत्री निर्मला सीतारमण होर लोकसभा च केन्द्रीय

बजट 2024–25 पेश करोग, बजट सत्र अगले म्हीने दी 12 तरीक तगर चल्लोग। नरेन्द्र मोदी सरकार दा एह अपने त्रीए कार्जकाल दा पैहला बजट होग। पिछले म्हीने संसद नै दौनें सदनें दी सांझी बैठक गी संबोधत करदे होई राष्ट्रपति द्रौपदी मुर्मू होरें इस गल्लै पर जोर भरेआ ऐ जे एह बजट सरकार दी दूरगामी नीतिएं ते भविक्ख दे नजरियै दा प्रभावी दस्तावेज होग। संसद दे बचत सत्र च सरकार गी 6 नमें बिल पेश करने दी मेद ऐ।

<><><><><><>

IT Outrage

सिविल हवाबाजी मंत्रालय नै आखेआ ऐ जे सब्बने हवाई अड्डें पर विमान संचालन प्रक्रिया सामान्य तौरा पर शुरू होई गई ऐ। माईक्रोसाफ्ट च गड़बड़ी दे चलदे कल हवाई डोआरियां प्रभावत होइयां हियां। मंत्रालय नै इक ब्यान च आखेआ ऐ जे एहदे च जेड़ियां रूकावटां आइयां हियां, उनेंगी ठीक कीता जा'रदा ऐ। मंत्रालय नै इब्बी आखेआ ऐ जे सरकार हवाई अड्डें दे कम्मकाज दी लगातार निगरानी करा'रदी ऐते एयरलाइंस इब्बी जकीनी बना'रदी ऐ जे जिंदी डोआरी छुड़की गई ही, उंदे आस्तै दूई डोआरी दा बंदोबस्त कीता जाग जां फही उंदे पैहे वापस करी दित्ते जांगन। वैश्विक माईक्रोसाफ्ट च गड़बड़ी होने दे मगरा दुनिया भरै च 5 ज्हार शा मती डोआरियां रद्द कीतियां गेइयां हियां। भारत च मती सारी डोआरिएं च जां ते चिर लग्गा हा ते किश डोआरियां रद्द कीतियां गेइयां हियां। उआं माईक्रोसाफ्ट दी सेवां बंद होने कन्नै भारतीय माली ते भुगतान प्रणाली पर मता असर नेई पेआ ऐ।

<><><><><><>

Nadda-India

रसैनें ते हैलें सरबंधी केन्द्री मंत्री जगत प्रकाश नड्डा होरें अज्ज आखेआ ऐ जे मुख्य गी 5 ट्रिलियन डॉलरें आली अर्थबवस्था बनाने च भारत गी रसैनें ते हैलें सरबंधी उद्योग थमां महत्वपूर्ण योगदान दी लोड़ ऐ। अज्ज रसैनें सरबंधी इक

समारोह गी संबोधत करदे होई मंत्री होरें आखेआ जे सरकार नीतिएं ते प्रोग्रामें सरबंधी हर लोड़चदी मदाद उपलब्ध करोआने लेई तैआर ऐ जिंदी उद्योगें गी बड़ी मती लोड़ ऐ। उनें आखेआ जे उद्योगें गी बी आयात, शोध, विकास ते कार्यबल सिखलाई दे खेत्तरे बक्खी बड़ा मता ध्यान देने दी लोड़ ऐ। नड्डा होरें मेद जताई जे मुंबई च आयोजित होने आला इंडिया-कैम्म 2024 कार्यक्रम रसैनें ते हैलें सरबंधी उद्योग लेई बड़ा फायदेमंद साबत होग। एह कार्यक्रम अंतर्राष्ट्रीय सतह दी प्रदर्शनी ते सम्मेलन ऐ जेहड़ा एशिया-प्रशांत खित्ते च इस उद्योग दे सब्बनें शा बड्डे संगठित कार्यक्रमें चा इक ऐ। त्रऊं ध्याड़े दे इस कार्यक्रम दा आयोजन 17 अक्तूबर गी मुंबई दे बामबे एकजीबीशन सेंटर च होग।

<><><><><><>

Army Chief

सेना प्रमुख जनरल उपेन्द्र द्विवेदी होरें अज्ज जम्मू कश्मीर केन्द्र शासत प्रदेश, टकोहदा करियै जम्मू प्रांतै दे सुरक्षा हालात दी समीक्षा कीती। अज्ज जम्मू पुज्जने पर सेनाध्यक्ष होरें पैह्ला पुलस मुख्यालय च इक बैठक दी अध्यक्षता करदे होई जम्मू प्रांतै च मजूदा हालात दा तफसीली जायजा लैता, टकोहदा करियै पिछले दिनें कटुआ ते डोडा जिले च होए दे आतंकी हमले दी पछोकड़ै च जिंदे व इक कैप्टन समेत 9 सैन्य कर्मी शहीद होई गे हे। बैठका च फौज दे सीनियर कमांडर, पुलसै दे पुलस महानिदेशक आर.आर.स्वैन हुंदे सने जम्मू कश्मीर पुलसै दे केई बड्डे अफसर ते होरने सुरक्षा अर्जेसिएं दे अफसर बी मजूद हे। सेना दे फामेशन कमांडर होरें उनेंगी सुरक्षाबलें आस्सेआ कीती जा'रदिएं कारवाइएं बारे तफसीली जानकारी दित्ती। मगरा उनें राजभवन जम्मू च उपराज्यपाल मनोज सिन्हा हुंदे नै बी मलाटी कीती ते सुरक्षा दे बक्ख-बक्ख पैहलुएं पर गल्लबात कीती। सेना प्रमुख हुंदे इस दौरे शा पैहले कल प्रधानमंत्री मोदी हुंदी अध्यक्षता च सुरक्षा बारे केबनेट कमेटी दी बैठक बी लग्गी ही।

<><><><><><>

India-Newziland

प्रधानमंत्री नरेन्द्र मोदी होरें न्यूजीलैंड दे अपने हमरूतबा क्रिस्टोफर लक्सन कन्नै टेलीफोन पर गल्लबात कीतीं इस दरान दौने नेताएं औने आले ब'रें च दपक्खी सैहयोग गी नमीं उंचाइएं तगर पजाने दी अपनी वचनबद्धताएं गी फही पक्का कीता। दौने पक्खें बक्ख-बक्ख खेत्तरें च दपक्खी सैहयोग गी अगगे बधाने पर सैहमत होए। एह्दे च बपार ते आर्थिक सैहयोग, पशुपालन, फार्मा स्यूटिकल्स, शिक्षा ते अंतरिक्ष सनें होर बी केई खेत्तर शामिल न। प्रधानमंत्री मोदी होरें न्यूजीलैंड च भारती प्रवासिएं दे हितें दा ध्यान रखने लेई श्री लक्सन हुंदा धन्नबाद कीता। श्री लक्सन होरें उंदी सुरक्षा ते कल्याण दी दिशा च लगातार जतन करने दा बी आश्वासन दित्ता।

<><><><><><>

Foreign Secretary Bhutan

विदेश सचिव विक्रम मिसरी ते भूटान दे विदेश सचिव ऑम पेमा चोडेन होरें अज्ज थिम्पू च त्रीह भारत-भूटान विकास सैहयोग वार्ता दी सांझे तौर पर अध्यक्षता कीती। इस बैठक दरान भूटानी पक्ख नै प्रोजेक्ट टायड असिस्टेंस-पीटीए प्रस्ताह पेश कीता ते 13मीं 5एं ब'रें दी योजना दरान लागू होने आली पीटीए परियोजनाएं दा पैहला माली अंश बी जारी कीता। इक ब्यान च विदेश मंत्रालय नै दस्सेआ जे दौने पक्खें बक्ख-बक्ख खेत्तरें च 4 जहार 958 करोड़ रुपें दी लागत दी कुल 61 परियोजनाएं गी मंजूरी दित्ती। इंदे च बुनियादी ढांचा, ऊर्जा, कौशल विकास, शिक्षा, सेहत, सांस्कृतिक विरासत, समर्थ निर्माण, खेड्ड, युवा गतिविधिएं दा अदान-प्रदान, डिजीटल अर्थबवस्था ते अंतरिक्ष टेक्नालोजी दे प्रोजेक्ट शामिल न। एह्दे अलावा भारत ते भूटान नै विकास सांझेदारी, ऊर्जा, बपार ते रास-पूंजी सनें, दपक्खी सैहयोग दे पैहलुएं पर बी चर्चा कीतीं इस ब'रे मार्च म्हीने प्रधानमंत्री हुंदी भूटान यात्रा दे दरान श्री मोदीं होरें 13मीं पंज ब'रे आली योजना अवधि लेई भारत आस्सेआ 10 जहार करोड़ रुपें

दा विकास सैहृयोग दित्ते जाने दा ऐलान कीता हा। विदेश सचिव विक्रम मिसरी भूटान दी दऊं दिनें दी सरकारी यात्रा पर हे। एह यात्रा अज्ज संपन्न होई गई। विदेश सचिव दे तौर पर कुसै मुख्य दी एह उंदी पैहली यात्रा ही।

<><><><><><>

Paris Olympics

इस म्हीने दी 26 तरीक गी शुरू होआ'रदिएं पेरिस ओलंपिक्स खेड्डें च हिस्सा लैने जा'रदे 117 भारतीय एथलीटें दे दल च 24 थेआरबंद बलें दे खडारी शामिल न। इनें 24एं च नेज्जा सुट्टने दी स्पर्धा च जा'रदे सुबेदार नीरज चोपड़ा सनें 22 मर्द ते 2 महिलां एथलीट शामिल न। रक्षा मंत्रालय नै आखेआ जे ओलंपिक्स च शामिल होने जा'रदे कुसै भारतीय दल च पैहली बारी दऊं महिलां सेना कर्मी शामिल न। 2020 आले आले टोकियो ओलंपिक्स च सुन्ने दा तगमा जित्ती चुके दे नीरज चोपड़ा कोला ऐकती बड़ी मतियां मेदां न। मंत्रालय दा आखना ऐ जे 2022 च राष्ट्रमंडल खेड्डें च कैह दा तगमा जित्ती चुकी दी हवालदार जैसमीन लम्बोरिया ते 2023 च एशियाई कुश्ती प्रतियोगिता च कैह दा तगमा जित्तने आली रितिका हूडा पैहली बारी ओलंपिक्स च जा करदियां न। मंत्रालय नै आखेआ जे थेआरबंद बलें दा ओलंपिक्स च जाना इस गल्लै दा सबूत ऐ जे साढ़े बलें दी खेड्डें गी लेइयै निष्ठा पक्की ऐ।

<><><><><><>

India Post Rakhi

भारतीय डाक मैहकमे नै लोकें गी सलाह दित्ती ऐ जे ओह अपने भ्राएं ते हिर्खिएं प्रेमिएं गी समें सिर रक्खड़ी पजाने लेई 31 जुलाई तगर रक्खड़ी भेजी देन। मैहकमे नै अंतर्राष्ट्रीय मेलिंग दिएं कठनाइएं कन्नै निबड़ने ते सीमा शुल्क सरबन्धी समस्याएं गी खत्म करने लेई एह सलाह जारी कीती ऐ। मैहकमे दा आखना ऐ जे रक्खड़ी आले लफाफे जां पैकेट गी सेही चाल्ली बंद कीता जा ते कन्नै पते दा

पिन कोड बी पूरा ते सेही सेही लिखेआ जा। एह्दे इलावा लोकें गी अपना मोबाइल नंबर बी लिखी रखने लेई आखेआ गेआ ऐ। मैह्कमे नै इब्बी सलाह जारी कीती ऐ जे रक्खड़ी आले लफाफे जां पैकेट च कोई बी खराब होने आली चीज, तौले अगग फगड़ने आली जां डुल्लने आली कोई चीज नेई रखन तां जे तुंदी रक्खड़ी सेही ढंगै सिर तुंदे प्रियजने तोड़ी पुज्जी सकै।

<><><><><><>

NEET

राष्ट्रीय परीक्षा अजेंसी एनटीए नै डाक्टरी दी पढ़ाई लेई दाखला मतेयान नीट-यूजी दा शैहर ते सेंटर साब्वै रिजल्ट अपनी वेबसाइट पर अपलोड करी दित्ता ऐ। एनटीए नै सुप्रीम कोर्ट दे निर्देश दे बाद एह् नतीजे वेबसाइट पर चाढ़े न। एह्दे शा पैहले अदालतै एनटीए गी मेदवारें दी पंछान दी मास्किंग करियै अज्ज दपैहरी 12 बजे तोड़ी वेबसाइट पर शैहरे-साब्वै ते मतेयान सेंटर साब्वै नतीजे घोषत करने दा निर्देश दित्ता हा। नतीजे वेबसाइट neet.ntaonline.in पर उपलब्ध न।

<><><><><><>

India-Bangladesh

बंग्लादेश च होआ'रदे हिंसक प्रदर्शनें करी तकरीबन 1 ज्हार भारती विद्यार्थी उत्थुआं अपने मुल्ख वापस आई गेदे न। विदेश मंत्रालय मूजब 778 भारती विद्यार्थी शिड़क रस्तेया स्वदेश पुज्जे न। एह्दे अलावा तकरीबन 200 विद्यार्थी ब्हाइ जहाजै राएं बी परतोए न। मंत्रालय नै दस्सेआ जे ढाका च भारती सफारतखाने सनें चटगांव, राजशाही, सिलहर ते "खुलना" दे सहायक उच्च-आयोग भारती बसनीकें गी मुल्ख परतोने च मदाद करे करदे न। मंत्रालय भारती बसनीकें दी निर्बिध्न वापसी जकीनी बनाने लेई सिविल हवाबाजी, इमीग्रेशन, बंदरगाह ते सीमा सुरक्षा बल दे ऐह्लकारें कन्नै बी तालमेल करै करदा

ऐ। ढाका च भारती उच्च आयोग ते सहायक उच्च आयोगें, बंग्लादेश दिऐं बक्ख-बक्ख यूनिवर्सिटिएं च बकाया रौह्दे 4 जहार शा मते विद्यार्थिएं कन्ने लगातार राबता बनाए दा ऐं भारती उच्च आयोग नै आखेआ ऐ जे नेपाल ते भूटान दे विद्यार्थिएं दी बी भारत च दाखल होने च सहायता कीती गई ऐ।

<><><><><><>

JK Startup

उपराज्यपाल मनोज सिन्हा होरें हौसला टू प्वाइंट ओ ते जेके स्टार्टअप पोर्टल दी शुरूआत करदे मौके अपने संबोधनै च सब्बने महिलां ते युवा स्टार्टअप उद्यमिएं गी शुभकामनां दित्तियां। उनें दस्सेआ जे हौसला प्रोग्राम दा बुनियादी मकसद जम्मू कश्मीर च महिलाएं च मजूद उद्यमशीलता आली छमता गी बढ़ावा देना, उंदी बजारै तोड़ी सखल्ली पुज्ज जकीनी बनाना तां जे ओ अपने उत्पाद उत्थें बेची सकन ते महिलाएं दे आर्थिक सशक्तिकरण ते विकास दी बत्त पदरी होई सकै। जम्मू कश्मीर च उद्यमता ते स्टार्टअप्स गी बढ़ावा देने दे सरकार दे धेइयै गी फही पक्का करदे होई उपराज्यपाल होरें आखेआ जे प्रधानमंत्री नरेन्द्र मोदी हुंदे मार्गदर्शन च रंभी गेदी इस मुहिम तैहत् इत्थें स्टार्टअप नीति गी पूरी तरतीब ते सलीके सिर लागू कीता जाग तां जे एह्दे लाह् हर उस नोजवान ते महिलाएं गी हासल होग, जिनेंगी ध्यानै च रखदे होई उंदी शुरूआत कीती गेदी ऐ।

<><><><><><>

LG-Terrorism

केन्द्र शासत प्रदेश दे जम्मू प्रांतै च आतंकवादी हिंसा च आई दी तेजी लेई पाकिस्तान गी जिम्मेदार ठैहरांदे होई उपराज्यपाल मनोज सिन्हा होरें आखेआ ऐ जे साढ़े सुरक्षाबल जम्मू प्रांतै च बी आतंकवाद दा उस्सै चाल्ली सफाया करी देंगन जियां उनें कश्मीर घाटी च कीता ऐ। उपराज्यपाल होरें अगगे आखेआ जे जम्मू कश्मीर च होआ'रदी तरक्की ते बदलाव गी दिक्खियै साढ़ा गोआंढी मुख्य

परेशान होई गेदा ऐ ते ओ जम्मू प्रांतै अंदर आतंकवाद च नमें सिरैया जान भरने लेई अपनी पूरी टिल्ल ला करदा ऐ। ओह अज्ज श्रीनगर दे अंतर्राष्ट्रीय कन्वेंशन सेंटर च हौसला टू प्वांइट ओ ते स्टार्ट अप्स पोर्टल दी शुरूआत करदे मौके बोला करदे हे। उनें आखेआ जे जम्मू कश्मीर दे लोक रमानदारी, तरक्की, सद्भाव, भाईचारे आले माहौल च जीना पसिंद करदे न ते एह पाकिस्तान गी दिक्खी नेई सखाह करदा।

<><><><><><>

Weather

मौसम विभाग नै गुजरात, दक्खन महाराष्ट्र, गोवा, दक्खनी छत्तीसगढ़ दे समुंद्री इलाकें, च बड़ी मती बरखा बरने दी पेशगोई कीती ऐ। साढ़े संवाददाता नै जानकारी दित्ती ऐ जे मैहकमे आस्सेआ जारी चेतावनी मूजब केरल दे केई सारे हिस्सें, तेलंगाना, आंध्रप्रदेश दे समुंद्री कंडे कन्ने लगदे इलाके, ओडिशा, विदर्भ, छत्तीसगढ़ ते मध्य प्रदेश च बी भारी बरखा दे असार बने दे न जिसलै जे झारखंड ते पच्छिम बंगाल दे गंगा तट आले इलाकें च अज्ज ते हिमाचल प्रदेश, उत्तराखंड, उत्तर प्रदेश, हरियाणा, पूर्वी राजस्थान दे पूर्वी कर्नाटकदे अंदरे इलाके च ओंदे 4 दिनें च बरखा आली स्थिति बनी दी रौहग। मौसम विभाग ने इंदे इलावा ओंदे 5 दिनें दरान पच्छमी उत्तर प्रदेश, हरियाणा, पच्छमी राजस्थान, पंजापब, हिमाचल प्रदेश ते उत्तराखंड च बी बरखा दे आसार दस्से दे न।

<><><><><><>

Women Cricket

महिला एशिया कप टी-20 क्रिकेट प्रतियोगिता च अज्ज श्रीलंका दे दाम्बुला च थाईलैंड दा मकाबला मलेशिया कन्नै होआ जेहदे च थाईलैंड नै मलेशिया गी 22एं रजें कन्नै हराई दित्ता। मलेशिया 134 रंजें दा पिच्छा करदे होई 20 ओवरें च 8 विकेटां मुआइयै 111 रंज गै बनाई सकी। पैहूले बल्लेबाजी करदे होई

थाईलैंड नै 20 ओवरें च 133 रंज बनाए। इक होर मैच अज्ज श्रीलंका ते
बंगलादेश बशकार इस्सै स्टेडियम च होग।

<><><><><><>